

第2週2020/03/13〔單元主題〕：菩薩、摩訶薩、被大乘鎧、大乘相

\* 《大般若波羅蜜多經·第二會·六到彼岸品第十三》，唐·玄奘譯，T. 220 (2), vol. 7, pp. 62a-67b.

爾時，滿慈子白佛言：「世尊！我亦樂以智慧辯才，說諸菩薩·由此義故·名摩訶薩。」

佛告滿慈子：「隨汝意說。」

滿慈子言：「世尊！以諸菩薩，普為利樂一切有情，被大功德鎧故，發趣大乘故，乘大乘故，名摩訶薩。」

時，舍利子問滿慈子言：「云何菩薩摩訶薩，普為利樂一切有情，被大功德鎧？」

滿慈子言：「舍利子！諸菩薩摩訶薩，修行布施波羅蜜多時，不為利樂少分有情修行布施波羅蜜多，普為利樂一切有情修行布施波羅蜜多。諸菩薩摩訶薩，修行淨戒波羅蜜多時，不為利樂少分有情修行淨戒波羅蜜多，普為利樂一切有情修行淨戒波羅蜜多。諸菩薩摩訶薩，修行安忍波羅蜜多時，不為利樂少分有情修行安忍波羅蜜多，普為利樂一切有情修行安忍波羅蜜多。諸菩薩摩訶薩，修行精進波羅蜜多時，不為利樂少分有情修行精進波羅蜜多，普為利樂一切有情修行精進波羅蜜多。諸菩薩摩訶薩，修行靜慮波羅蜜多時，不為利樂少分有情修行靜慮波羅蜜多，普為利樂一切有情修行靜慮波羅蜜多。諸菩薩摩訶薩，修行般若波羅蜜多時，不為利樂少分有情修行般若波羅蜜多，普為利樂一切有情修行般若波羅蜜多。舍利子！是為菩薩摩訶薩·普為利樂一切有情·被大功德鎧。

復次，舍利子！諸菩薩摩訶薩，被大功德鎧，利樂有情，不為分限；不作是念：『我當拔濟·爾所有情·令入無餘般涅槃界，爾所有情·不令其入；我當拔濟·爾所有情·令住無上正等菩提，爾所有情·不令其住。』然，諸菩薩摩訶薩，普為拔濟一切有情，令入無餘般涅槃界·及住無上正等菩提。舍利子！是為菩薩摩訶薩·普為利樂一切有情·被大功德鎧。

復次，舍利子！諸菩薩摩訶薩，作如是念：『我當自圓滿布施波羅蜜多，亦令一切有情圓滿布施波羅蜜多。我當自圓滿淨戒波羅蜜多，亦令一切有情圓滿淨戒波羅蜜多。我當自圓滿安忍波羅蜜多，亦令一切有情圓滿安忍波羅蜜多。我當自圓滿精進波羅蜜多，亦令一切有情圓滿精進波羅蜜多。我當自圓滿靜慮波羅蜜多，亦令一切有情圓滿靜慮波羅蜜多。我當自圓滿般若波羅蜜多，亦令一切有情圓滿般若波羅蜜多。』諸菩薩摩訶薩，作如是念：『我當自依如是六種波羅蜜多，安住內空乃至無性自性空，修行四念住乃至十八不共法；亦令一切有情依此六種波羅蜜多，安住內空乃至無性自性空，修行四念住乃至十八不共法。』諸菩薩摩訶薩，作如是念：『我當自依如是六種波羅蜜多，速證無上正等菩提，入無餘依般涅槃界；亦令一切有情依此六種波羅蜜多，速證無上正等菩提，入無餘依般涅槃界。』舍利子！是為菩薩摩訶薩·普為利樂一切有情·被大功德鎧。

復次，舍利子！諸菩薩摩訶薩，修行布施波羅蜜多時，以一切智智相應作意，而修布施波羅蜜多。持此善根，以無所得而為方便，與一切有情，同共，迴向一切智智；於布施時，都無所悋。舍利子！是為菩薩摩訶薩·修行布施波羅蜜多時·所被·布施波羅蜜多·大功德鎧。

復次，舍利子！諸菩薩摩訶薩，修行布施波羅蜜多時，以一切智智相應作意，而修布施波羅蜜多。持此善根，以無所得而為方便，與一切有情，同共，迴向一切智智；於布施時，不起聲聞、獨覺作意。舍利子！是為菩薩摩訶薩·修行布施波羅蜜多時·所被·淨戒波羅蜜多·大功德鎧。

復次，舍利子！諸菩薩摩訶薩，修行布施波羅蜜多時，以一切智智相應作意，而修布施波羅蜜多。持此善根，以無所得而為方便，與一切有情，同共迴向一切智智；於布施時，信忍欲樂·修布施法。舍利子！是為菩薩摩訶薩·修行布施波羅蜜多時·所被·安忍波羅蜜多·大功德鎧。

復次，舍利子！諸菩薩摩訶薩，修行布施波羅蜜多時，以一切智智相應作意，而修布施波羅蜜多。持此善根，以無所得而為方便，與一切有情，同共迴向一切智智；於布施時，精進勇猛，不捨加行。舍利子！是為菩薩摩訶薩·修行布施波羅蜜多時·所被·精進波羅蜜多·大功德鎧。

復次，舍利子！諸菩薩摩訶薩，修行布施波羅蜜多時，以一切智智相應作意，而修布施波羅蜜多。持此善根，以無所得而為方便，與一切有情，同共迴向一切智智；於布施時，一心趣向一切智智，究竟利樂一切有情，不雜聲聞、獨覺作意。舍利子！是為菩薩摩訶薩·修行布施波羅蜜多時·所被·靜慮波羅蜜多·大功德鎧。

復次，舍利子！諸菩薩摩訶薩，修行布施波羅蜜多時，以一切智智相應作意，而修布施波羅蜜多。持此善根，以無所得而為方便，與一切有情，同共迴向一切智智；於布施時，住如幻想，不得施者、受者、施物、施所得果。舍利子！是為菩薩摩訶薩·修行布施波羅蜜多時·所被·般若波羅蜜多·大功德鎧。

舍利子！如是菩薩摩訶薩，修行布施波羅蜜多時，具被六種波羅蜜多·大功德鎧。舍利子！若菩薩摩訶薩，以一切智智相應作意，修行布施波羅蜜多時，於六波羅蜜多相，不取、不得，當知是菩薩摩訶薩被大功德鎧。

復次，舍利子！諸菩薩摩訶薩，修行淨戒波羅蜜多時，以一切智智相應作意，而修淨戒波羅蜜多。持此善根，以無所得而為方便，與一切有情，同共迴向一切智智；修淨戒時，於諸所有，都無慳悋。舍利子！是為菩薩摩訶薩·修行淨戒波羅蜜多時·所被·布施波羅蜜多·大功德鎧。

復次，舍利子！諸菩薩摩訶薩，修行淨戒波羅蜜多時，以一切智智相應作意，而修淨戒波羅蜜多。持此善根，以無所得而為方便，與一切有情，同共迴向

一切智智；修淨戒時，於諸聲聞及獨覺地尚不趣求，況異生地！舍利子！是為菩薩摩訶薩·修行淨戒波羅蜜多時·所被·淨戒波羅蜜多·大功德鎧。

復次，舍利子！諸菩薩摩訶薩，修行淨戒波羅蜜多時，以一切智智相應作意，而修淨戒波羅蜜多。持此善根，以無所得而為方便，與一切有情，同共迴向一切智智；修淨戒時，於淨戒法，信忍欲樂。舍利子！是為菩薩摩訶薩·修行淨戒波羅蜜多時·所被·安忍波羅蜜多·大功德鎧。

復次，舍利子！諸菩薩摩訶薩，修行淨戒波羅蜜多時，以一切智智相應作意，而修淨戒波羅蜜多。持此善根，以無所得而為方便，與一切有情，同共迴向一切智智；修淨戒時，精進勇猛，不捨加行。舍利子！是為菩薩摩訶薩·修行淨戒波羅蜜多時·所被·精進波羅蜜多·大功德鎧。

復次，舍利子！諸菩薩摩訶薩，修行淨戒波羅蜜多時，以一切智智相應作意，而修淨戒波羅蜜多。持此善根，以無所得而為方便，與一切有情，同共迴向一切智智；修淨戒時，純以大悲，而為上首，尚不間雜二乘作意，況異生心！舍利子！是為菩薩摩訶薩·修行淨戒波羅蜜多時·所被·靜慮波羅蜜多·大功德鎧。

復次，舍利子！諸菩薩摩訶薩，修行淨戒波羅蜜多時，以一切智智相應作意，而修淨戒波羅蜜多。持此善根，以無所得而為方便，與一切有情，同共迴向一切智智；修淨戒時，於一切法，住如幻想，於淨戒行，無恃、無得，本性空故。舍利子！是為菩薩摩訶薩·修行淨戒波羅蜜多時·所被·般若波羅蜜多·大功德鎧。

舍利子！如是菩薩摩訶薩，修行淨戒波羅蜜多時，具被六種波羅蜜多·大功德鎧。舍利子！若菩薩摩訶薩，以一切智智相應作意，修行淨戒波羅蜜多時，於六波羅蜜多相，不取、不得，當知是菩薩摩訶薩被大功德鎧。

復次，舍利子！諸菩薩摩訶薩，修行安忍波羅蜜多時，以一切智智相應作意，而修安忍波羅蜜多。持此善根，以無所得而為方便，與一切有情，同共迴向一切智智；修安忍時，為成安忍，於身命等，無所戀著。舍利子！是為菩薩摩訶薩·修行安忍波羅蜜多時·所被·布施波羅蜜多·大功德鎧。

復次，舍利子！諸菩薩摩訶薩，修行安忍波羅蜜多時，以一切智智相應作意，而修安忍波羅蜜多。持此善根，以無所得而為方便，與一切有情，同共迴向一切智智；修安忍時，不雜聲聞及獨覺等·下劣作意。舍利子！是為菩薩摩訶薩·修行安忍波羅蜜多時·所被·淨戒波羅蜜多·大功德鎧。

復次，舍利子！諸菩薩摩訶薩，修行安忍波羅蜜多時，以一切智智相應作意，而修安忍波羅蜜多。持此善根，以無所得而為方便，與一切有情，同共迴向一切智智；修安忍時，於安忍法，信忍欲樂。舍利子！是為菩薩摩訶薩·修行安忍波羅蜜多時·所被·安忍波羅蜜多·大功德鎧。

復次，舍利子！諸菩薩摩訶薩，修行安忍波羅蜜多時，以一切智智相應作意，而修安忍波羅蜜多。持此善根，以無所得而為方便，與一切有情，同共迴向一切智智；修安忍時，精進勇猛，不捨加行。舍利子！是為菩薩摩訶薩·修行安忍波羅蜜多時·所被·精進波羅蜜多·大功德鎧。

復次，舍利子！諸菩薩摩訶薩，修行安忍波羅蜜多時，以一切智智相應作意，而修安忍波羅蜜多。持此善根，以無所得而為方便，與一切有情，同共迴向一切智智；修安忍時，攝心一境，雖遇眾苦，而心無亂。舍利子！是為菩薩摩訶薩·修行安忍波羅蜜多時·所被·靜慮波羅蜜多·大功德鎧。

復次，舍利子！諸菩薩摩訶薩，修行安忍波羅蜜多時，以一切智智相應作意，而修安忍波羅蜜多。持此善根，以無所得而為方便，與一切有情，同共迴向一切智智；修安忍時，住如幻想，為集佛法，成熟有情，觀諸法空，不執怨、害。舍利子！是為菩薩摩訶薩·修行安忍波羅蜜多時·所被·般若波羅蜜多·大功德鎧。

舍利子！如是菩薩摩訶薩，修行安忍波羅蜜多時，具被六種波羅蜜多·大功德鎧。舍利子！若菩薩摩訶薩，以一切智智相應作意，修行安忍波羅蜜多時，於六波羅蜜多相，不取、不得，當知是菩薩摩訶薩被大功德鎧。

復次，舍利子！諸菩薩摩訶薩，修行精進波羅蜜多時，以一切智智相應作意，而修精進波羅蜜多。持此善根，以無所得而為方便，與一切有情，同共迴向一切智智；修精進時，能勤修學難行施行。舍利子！是為菩薩摩訶薩·修行精進波羅蜜多時·所被·布施波羅蜜多·大功德鎧。

復次，舍利子！諸菩薩摩訶薩，修行精進波羅蜜多時，以一切智智相應作意，而修精進波羅蜜多。持此善根，以無所得而為方便，與一切有情，同共迴向一切智智；修精進時，勤護淨戒，終無毀犯。舍利子！是為菩薩摩訶薩·修行精進波羅蜜多時·所被·淨戒波羅蜜多·大功德鎧。

復次，舍利子！諸菩薩摩訶薩，修行精進波羅蜜多時，以一切智智相應作意，而修精進波羅蜜多。持此善根，以無所得而為方便，與一切有情，同共迴向一切智智；修精進時，能勤修學難行忍行。舍利子！是為菩薩摩訶薩·修行精進波羅蜜多時·所被·安忍波羅蜜多·大功德鎧。

復次，舍利子！諸菩薩摩訶薩，修行精進波羅蜜多時，以一切智智相應作意，而修精進波羅蜜多。持此善根，以無所得而為方便，與一切有情，同共迴向一切智智；修精進時，能勤修學有益苦行。舍利子！是為菩薩摩訶薩·修行精進波羅蜜多時·所被·精進波羅蜜多·大功德鎧。

復次，舍利子！諸菩薩摩訶薩，修行精進波羅蜜多時，以一切智智相應作意，而修精進波羅蜜多。持此善根，以無所得而為方便，與一切有情，同共迴向

一切智智；修精進時，能勤修學靜慮、等至。舍利子！是為菩薩摩訶薩·修行精進波羅蜜多時·所被·靜慮波羅蜜多·大功德鎧。

復次，舍利子！諸菩薩摩訶薩，修行精進波羅蜜多時，以一切智智相應作意，而修精進波羅蜜多。持此善根，以無所得而為方便，與一切有情，同共迴向一切智智；修精進時，能勤修學無取著慧。舍利子！是為菩薩摩訶薩·修行精進波羅蜜多時·所被·般若波羅蜜多·大功德鎧。

舍利子！如是菩薩摩訶薩，修行精進波羅蜜多時，具被六種波羅蜜多·大功德鎧。舍利子！若菩薩摩訶薩，以一切智智相應作意，修行精進波羅蜜多時，於六波羅蜜多相，不取、不著，當知是菩薩摩訶薩被大功德鎧。

復次，舍利子！諸菩薩摩訶薩，修行靜慮波羅蜜多時，以一切智智相應作意，而修靜慮波羅蜜多。持此善根，以無所得而為方便，與一切有情，同共迴向一切智智；修靜慮時，靜心行施，亂心慳悋·不復現前。舍利子！是為菩薩摩訶薩·修行靜慮波羅蜜多時·所被·布施波羅蜜多·大功德鎧。

復次，舍利子！諸菩薩摩訶薩，修行靜慮波羅蜜多時，以一切智智相應作意，而修靜慮波羅蜜多。持此善根，以無所得而為方便，與一切有情，同共迴向一切智智；修靜慮時，定心護戒，令諸惡戒·不復現前。舍利子！是為菩薩摩訶薩·修行靜慮波羅蜜多時·所被·淨戒波羅蜜多·大功德鎧。

復次，舍利子！諸菩薩摩訶薩，修行靜慮波羅蜜多時，以一切智智相應作意，而修靜慮波羅蜜多。持此善根，以無所得而為方便，與一切有情，同共迴向一切智智；修靜慮時，住慈悲定，而修安忍，不惱有情。舍利子！是為菩薩摩訶薩·修行靜慮波羅蜜多時·所被·安忍波羅蜜多·大功德鎧。

復次，舍利子！諸菩薩摩訶薩，修行靜慮波羅蜜多時，以一切智智相應作意，而修靜慮波羅蜜多。持此善根，以無所得而為方便，與一切有情，同共迴向一切智智；修靜慮時，安住淨定，勤修功德，離諸懈怠。舍利子！是為菩薩摩訶薩·修行靜慮波羅蜜多時·所被·精進波羅蜜多·大功德鎧。

復次，舍利子！諸菩薩摩訶薩，修行靜慮波羅蜜多時，以一切智智相應作意，而修靜慮波羅蜜多。持此善根，以無所得而為方便，與一切有情，同共迴向一切智智；修靜慮時，依靜慮等，引發勝定，離擾亂心。舍利子！是為菩薩摩訶薩·修行靜慮波羅蜜多時·所被·靜慮波羅蜜多·大功德鎧。

復次，舍利子！諸菩薩摩訶薩，修行靜慮波羅蜜多時，以一切智智相應作意，而修靜慮波羅蜜多。持此善根，以無所得而為方便，與一切有情，同共迴向一切智智；修靜慮時，依靜慮等，引發勝慧，離惡慧心。舍利子！是為菩薩摩訶薩·修行靜慮波羅蜜多時·所被·般若波羅蜜多·大功德鎧。

舍利子！如是菩薩摩訶薩，修行靜慮波羅蜜多時，具被六種波羅蜜多·大功德鎧。舍利子！若菩薩摩訶薩，以一切智智相應作意，修行靜慮波羅蜜多時，於六波羅蜜多相，不取、不得，當知是菩薩摩訶薩被大功德鎧。

復次，舍利子！諸菩薩摩訶薩，修行般若波羅蜜多時，以一切智智相應作意，而修般若波羅蜜多。持此善根，以無所得而為方便，與一切有情，同共迴向一切智智；修般若時，雖施一切，而能不見施、受者、物。舍利子！是為菩薩摩訶薩·修行般若波羅蜜多時·所被·布施波羅蜜多·大功德鎧。

復次，舍利子！諸菩薩摩訶薩，修行般若波羅蜜多時，以一切智智相應作意，而修般若波羅蜜多。持此善根，以無所得而為方便，與一切有情，同共迴向一切智智；修般若時，雖護淨戒，而都不見持、犯·差別。舍利子！是為菩薩摩訶薩·修行般若波羅蜜多時·所被·淨戒波羅蜜多·大功德鎧。

復次，舍利子！諸菩薩摩訶薩，修行般若波羅蜜多時，以一切智智相應作意，而修般若波羅蜜多。持此善根，以無所得而為方便，與一切有情，同共迴向一切智智；修般若時，依勝空慧，而修安忍，不見能忍、所忍等事。舍利子！是為菩薩摩訶薩·修行般若波羅蜜多時·所被·安忍波羅蜜多·大功德鎧。

復次，舍利子！諸菩薩摩訶薩，修行般若波羅蜜多時，以一切智智相應作意，而修般若波羅蜜多。持此善根，以無所得而為方便，與一切有情，同共迴向一切智智；修般若時，雖觀諸法·皆畢竟空，而以大悲，勤修善法。舍利子！是為菩薩摩訶薩·修行般若波羅蜜多時·所被·精進波羅蜜多·大功德鎧。

復次，舍利子！諸菩薩摩訶薩，修行般若波羅蜜多時，以一切智智相應作意，而修般若波羅蜜多，持此善根，以無所得而為方便，與一切有情，同共迴向一切智智。修般若時，雖修勝定，而觀定境·皆畢竟空。舍利子！是為菩薩摩訶薩·修行般若波羅蜜多時·所被·靜慮波羅蜜多·大功德鎧。

復次，舍利子！諸菩薩摩訶薩，修行般若波羅蜜多時，以一切智智相應作意，而修般若波羅蜜多。持此善根，以無所得而為方便，與一切有情，同共迴向一切智智。修般若時，觀一切法、一切有情、及一切行·皆如幻等，而修種種無取著慧。舍利子！是為菩薩摩訶薩·修行般若波羅蜜多時·所被般若波羅蜜多·大功德鎧。

舍利子！如是菩薩摩訶薩，修行般若波羅蜜多時，具被六種波羅蜜多·大功德鎧。舍利子！若菩薩摩訶薩，以一切智智相應作意，修行般若波羅蜜多時，於六波羅蜜多相，不取、不得，當知是菩薩摩訶薩被大功德鎧。

舍利子！如是名為諸菩薩摩訶薩·普為利樂一切有情·被大功德鎧。舍利子！諸菩薩摩訶薩，安住一一波羅蜜多，皆修六種波羅蜜多，令得圓滿。是故，名被大功德鎧。

復次，舍利子！諸菩薩摩訶薩，雖得靜慮、無量、無色，而不味著，亦不隨彼勢力受生，亦不為彼勢力所引。舍利子！是為菩薩摩訶薩·修行靜慮波羅蜜多時·所被·方便善巧般若波羅蜜多·大功德鎧。

復次，舍利子！諸菩薩摩訶薩，雖得靜慮、無量、無色，住遠離見、寂靜見、空無相無願見，而不證實際，不入聲聞及獨覺地，超勝一切聲聞、獨覺。舍利子！是為菩薩摩訶薩·修行靜慮波羅蜜多時·所被·方便善巧般若波羅蜜多·大功德鎧。

舍利子！由諸菩薩，普為利樂一切有情，被如是等大功德鎧故，復名摩訶薩。

舍利子！如是普為利樂有情·被大功德鎧·菩薩摩訶薩，普為十方殑伽沙等諸佛世界·一切如來·應·正等覺，處大眾中，歡喜、讚嘆，作如是言：『某方，某世界中，有某名菩薩摩訶薩，普為利樂一切有情，被大功德鎧，嚴淨佛土，成熟有情，遊戲神通，作所應作。』如是展轉聲遍十方，人、天等聞，皆大歡喜，咸作是言：『是菩薩摩訶薩，不久當證所求無上正等菩提，令諸有情皆獲利樂。』

爾時，舍利子問滿慈子言：「云何菩薩摩訶薩普，為利樂諸有情故，發趣大乘？」

滿慈子言：舍利子！諸菩薩摩訶薩，普為利樂一切有情，被六波羅蜜多·大功德鎧已，復為利樂諸有情故，離·欲、惡不善法，有尋、有伺，離·生喜樂，入初靜慮具足住，廣說乃至斷樂、斷苦，先·喜憂·沒，不苦、不樂，捨念清淨，入第四靜慮具足住。復依靜慮，起慈俱心，行相廣大，無二、無量，無怨、無害、無恨、無惱，遍滿善修，勝解周普，充溢十方，盡虛空，窮法界，慈心勝解具足而住；起悲、喜、捨俱心·行相勝解，亦復如是。依此加行，復超一切色想，滅有對想，不思惟種種想，入無邊空，空無邊處具足住；廣說乃至超一切無所有處，入非想非非想處具足住。舍利子！是菩薩摩訶薩，持此靜慮、無量、無色，以無所得而為方便，與一切有情，同共迴向一切智智。舍利子！是為菩薩摩訶薩·普為利樂諸有情故·發趣大乘。

復次，舍利子！諸菩薩摩訶薩，普為利樂諸有情故，先自安住如是靜慮、無量、無色，於入、住、出諸行、相、狀，善分別知。得自在已，復作是念：『我今當以一切智智相應作意，大悲為首，為斷一切有情諸煩惱故，說諸靜慮、無量、無色，分別開示，令善了知諸定·愛味、過患、出離，及入、住、出諸行、相、狀。』舍利子！是為菩薩摩訶薩·依止靜慮波羅蜜多·修行布施波羅蜜多·普為利樂諸有情故·發趣大乘。

若菩薩摩訶薩，以一切智智相應作意，大悲為首，說諸靜慮、無量、無色時，不為聲聞、獨覺等心·之所間雜。舍利子！是為菩薩摩訶薩·依止靜慮波羅蜜多·修行淨戒波羅蜜多·普為利樂諸有情故·發趣大乘。

若菩薩摩訶薩，以一切智智相應作意，大悲為首，說諸靜慮、無量、無色時，於如是法，信忍欲樂。舍利子！是為菩薩摩訶薩·依止靜慮波羅蜜多·修行安忍波羅蜜多·普為利樂諸有情故·發趣大乘。

若菩薩摩訶薩，以一切智智相應作意，大悲為首，修諸靜慮、無量、無色時，以自善根，為有情故，迴求無上正等菩提，於諸善根，勤修不息。舍利子！是為菩薩摩訶薩·依止靜慮波羅蜜多·修行精進波羅蜜多·普為利樂諸有情故·發趣大乘。

若菩薩摩訶薩，以一切智智相應作意，大悲為首，依諸靜慮、無量、無色，引發殊勝等至、等持、解脫、勝處、遍處等定，於入、住、出皆得自在，不墮聲聞、獨覺等地。舍利子！是為菩薩摩訶薩·依止靜慮波羅蜜多·修行靜慮波羅蜜多·普為利樂諸有情故·發趣大乘。

若菩薩摩訶薩，以一切智智相應作意，大悲為首，修諸靜慮、無量、無色時，於諸靜慮、無量、無色及靜慮支，以無常、苦、無我行相，及空、無相、無願行相，如實觀察，不捨大悲，不墮聲聞及獨覺地。舍利子！是為菩薩摩訶薩·依止靜慮波羅蜜多·修行般若波羅蜜多·普為利樂諸有情故·發趣大乘。

復次，舍利子！若菩薩摩訶薩，以一切智智相應作意，大悲為首，修慈定時，作如是念：『我當賑濟一切有情皆令得樂。』修悲定時，作如是念：『我當救拔一切有情皆令離苦。』修喜定時，作如是念：『我當讚勵一切有情皆令解脫。』修捨定時，作如是念：『我當等益一切有情皆令盡漏。』舍利子！是為菩薩摩訶薩·依止無量·修行布施波羅蜜多·普為利樂諸有情故·發趣大乘。

若菩薩摩訶薩，以一切智智相應作意，大悲為首，於四無量入、住、出時，終不趣求聲聞、獨覺，唯求無上正等菩提。舍利子！是為菩薩摩訶薩·依止無量·修行淨戒波羅蜜多·普為利樂諸有情故·發趣大乘。

若菩薩摩訶薩，以一切智智相應作意，大悲為首，於四無量入、住、出時，不雜聲聞、獨覺作意，唯於無上正等菩提，信忍欲樂。舍利子！是為菩薩摩訶薩·依止無量·修行安忍波羅蜜多·普為利樂諸有情故·發趣大乘。

若菩薩摩訶薩，以一切智智相應作意，大悲為首，於四無量入、住、出時，勤斷諸惡，勤修諸善，求趣菩提，曾無暫捨。舍利子！是為菩薩摩訶薩·依止無量·修行精進波羅蜜多·普為利樂諸有情故·發趣大乘。

若菩薩摩訶薩，以一切智智相應作意，大悲為首，於四無量入、住、出時，引發種種等持、等至，能於其中，得大自在，不為彼定之所引奪，亦不隨彼勢力受生。舍利子！是為菩薩摩訶薩·依止無量·修行靜慮波羅蜜多·普為利樂諸有情故·發趣大乘。

若菩薩摩訶薩，以一切智智相應作意，大悲為首，於四無量入、住、出時，以無常、苦、無我行相及空、無相、無願行相，如實觀察，不捨大悲，不墮聲聞及獨覺地。舍利子！是為菩薩摩訶薩·依止無量·修行般若波羅蜜多·普為利樂諸有情故·發趣大乘。

舍利子！諸菩薩摩訶薩，依如是等方便善巧，修習六種波羅蜜多，普為利樂諸有情故，發趣大乘。

復次，舍利子！若菩薩摩訶薩，以一切智智相應作意，大悲為首，修一切種四念住，乃至八聖道支，修一切種三解脫門，乃至修一切種如來十力乃至十八不共法，以無所得而為方便，與一切有情，同共迴向一切智智。舍利子！是為菩薩摩訶薩·普為利樂諸有情故·發趣大乘。

復次，舍利子！若菩薩摩訶薩，以一切智智相應作意，大悲為首，無所得為方便，起內空智，乃至起無性自性空智，以無所得而為方便，與一切有情，同共迴向一切智智。舍利子！是為菩薩摩訶薩·普為利樂諸有情故·發趣大乘。

若菩薩摩訶薩，以一切智智相應作意，大悲為首，無所得為方便，於一切法，發起非亂非定妙智、非常非無常妙智、非樂非苦妙智、非我非無我妙智、非淨非不淨妙智、非空非不空妙智、非有相非無相妙智、非有願非無願妙智、非寂靜非不寂靜妙智、非遠離非不遠離妙智，以無所得而為方便，與一切有情，同共迴向一切智智。舍利子！是為菩薩摩訶薩·普為利樂諸有情故·發趣大乘。

若菩薩摩訶薩，以一切智智相應作意，大悲為首，無所得為方便，智不行過去、未來、現在，非不知三世法；智不行欲、色、無色界，非不知三界法；智不行善、不善、無記，非不知三性法；智不行世間、出世間，非不知世間、出世間法；智不行有為、無為，非不知有為、無為法；智不行有漏、無漏，非不知有漏、無漏法，智以無所得而為方便，與一切有情，同共迴向一切智智。舍利子！是為菩薩摩訶薩·普為利樂諸有情故·發趣大乘。

舍利子！以諸菩薩，由如是等方便善巧，普為利樂諸有情故，發趣大乘，故復名摩訶薩。

舍利子！如是普為利樂有情·發趣大乘·菩薩摩訶薩，普為十方殞伽沙等·諸佛世界·一切如來·應·正等覺，處大眾中，歡喜、讚嘆，作如是言：『某方，某世界中，有某名菩薩摩訶薩，普為利樂一切有情，發趣大乘，嚴淨佛土，成熟

有情，遊戲神通，作所應作。』如是展轉聲遍十方，人、天等聞，皆大歡喜，咸作是言：『是菩薩摩訶薩，不久當證所求無上正等菩提，令諸有情皆獲利樂。』』